

# عين القمر

مسرحية للأطفال

فاطمة هانم يعقوب



## بطاقة الكتاب

-----

### عين القمر فاطمة هانم يعقوب مسرحية للأطفال

رقم الإيداع : ٢٧٤٢١ / ٢٠١٩  
الطبعة الأولى  
عدد الصفحات : ٢٨  
تاريخ الإصدار : ديسمبر ٢٠١٩

الإخراج الفني والمراجعة اللغوية  
دار وادي عبقر للطباعة والنشر  
رئيس مجلس الإدارة

جابر الزهيرى  
المدير التنفيذي  
أياء حمدي

جميع حقوق الطبع والنشر  
محفوظة للمؤلف، ولا يحق لأى دار  
نشر طبع ونشر وتوزيع الكتاب إلا  
بموافقة كتابية من الكاتب والناشر



## دار وادي عبقر

للطباعة و النشر و التوزيع  
بيت الإبداع .. و موطن العباقرة



wadiabkr.wixsite.com/wadiabkr



wadiabkar@gmail.com



www.facebook/ wadiabkar

Watch on



www.youtube.com/ wadiabkr /



٠١١٤١٧٢٨٦٢٥

٠١١٠٠٤٧٤٥٧٥

٠١٢٢٤٩٦٩٠٤٨

٠١٢٢١٤٨١٨٥٦



# إهداء

إلى حبايب قلبي

وعصافير جنتي وسعادتي

أهدي هذه المسرحية، ليتعلموا استعمال عقولهم قبل قوتهم.

فاطمة فنانم يعقوب

ديسمبر ٢٠١٩



الوقت : نهارا

المكان : غابة

### شخصيات المسرحية

مجموعة من فيلة صغار وكبار

زعيم الفيلة أكبرهم حجما ومجموعة من الفيلة حوالي ٥ أو ٦ كومبارس

الفيل فلفل ( يرتدي زي مختلف حتى يتميز عن باقي الفيلة )

الفيل ١

الفيل ٢

مجموعة الأرناب

زعيم الأرناب أكبرهم حجما ومجموعة من الأرناب حوالي ٥ أو ٦ كومبارس

الأرنبة ياسمينة ( ترتدي ملابس أسود وأبيض حتى تكون مميزة عن باقي الأرناب )

أرنب ١

أرنب ٢



# المنظر الأول

المسرح خلفية صفراء تدل على الصحراء لا يوجد بها أشجار  
تسمع أصوات من خارج المسرح لجماعة الغيلة يقترب فتعلو الأصوات  
بالتدرج

مجموعة من الغيلة يدخلون إلى المسرح مع ضوضاء وفوضى  
الغيلة يقفون في مجموعات وسط المسرح يتحدثون  
تسمع همهمة غير مفهومة

الزعيم : اسمعوا جمعتمكم النهاردة علشان نتشاور في موضوع  
نقص المية والعشب

فلفل : عاوزين مية يا زعيم

الفيل ١ : وحنعمل إيه يا زعيم ؟

الفيل ٢ : ولادنا جاعوا

الفيل ١ : وإحنا عطشائين

(باقي الغيلة يقفون كمبارس على المسرح)

الزعيم : الصبر الصبر يا جماعة..... فكروا حنعمل إيه؟؟

الفيل ١ : أيوة لازم نعمل حاجة



الفيل ٢ : أوبة وبسرعة

فلفل : عاوزين ميه الزعيم

الزعيم : طب فكروا نعمل إيه؟

الفيل ١ : ننقل لمكان تاني فيه مية

الفيل ٢ : صح وبسرعة

فلفل : طب ندور عن مكان وبعدين نروح

الفيل ١ : صح بدل ما نروح كلنا ونتعب ونرجع تاني

الزعيم : صح ..... فلفل

فلفل : نعم يا زعيم

الزعيم : انت تروح تدور عن مكان يناسب عددنا.. وتعالى قولنا  
بسرعة

فلفل : حاضر حروح أدور على مكان فيه مية وارجع لكم بسرعة

(الفيل فلفل يخرج من المسرح وهو يجري بسرعة وأرجح زلومته  
يميل وشمال في شكل فكا هي )

الجميع (بلوحون له وبصيحون ) : مع السلامة

الزعيم : ارجع بسرعة يا فلفل

الفيل ١ : بسرعة يا فلفل

الفيل ٢ : بسرعة بسرعة



صوت فلغل يأتي من خارج المسرح

فلغل : حاضر حاضر

الفيلة ينتشرون على المسرح في مجموعات صغيرة يتكلمون وتطفأ  
أنوار المسرح بالتدرج مع سماع همهمة غير مفهومة حتى تختفي

يسدل الستار



## المنظر الثاني

صوت الهمهمة تعلو رويدا رويدا مع فتح ستار المسرح على نفس المنظر السابق وتظهر مجموعات الفيلة ومعهم زعيمهم

الفيل ١: فُئِلْ تاخر

الفيل ٢: تعبنا من العطش

( ينام على الأرض في إعياء ) ويفعل باقى الفيلة الكومبارس

الزعيم : اصبروا زماته جاي

صوت صياح فيل يأتي من خارج المسرح

الجميع ( يصيحون في فرح ) : فُئِلْ جه فُئِلْ جه فُئِلْ جه

الفيل ١ : يا رب يكون لقي ميه

الفيل ٢ : يا رب

الجميع ينهضون ويقفون بسرعة

ويدخل فلفل إلى المسرح وهو يصيح في فرح

فلفل : وجدتها... وجدتها

الزعيم : يا ابني قولي بسرعة

فلفل : لاقيت الميه يا زعيم



الزعيم : فين أول بقي

فلفل : في عين القمر

الفيل ١ : عين القمر انت بتهزر هاهاهاها

الفيل ٢ : حطلعنا القمر هاهاها

الجميع (يضحكون) : هاهاهاهاهاها

الزعيم : يا جماعة استنوا شوية

فلفل ٢ : انت مش سامع يا زعيم بيقول إيه قال عين القمر قال  
هاهاهاها

الفيل ١ : يا خبر أبيض

الزعيم : قول يا فلفل قول إيه حكاية عين القمر دي

فلفل : يا زعيم عين الأمر دي مكان قريب من هنا

الفيل ٢ : آه يعني مش الأمر اللي فوق

الجميع (يضحكون) : هاهاهاهاهاها

الزعيم : أول أول سيبك منهم فين هي

فلفل : قريبه مننا هنا و فيها بير مية و حوليه شجر كتيبيير

الفيل ٢ : ياعم أول كده من الأول

الزعيم : يلا يا جماعة حنروح هناك يلا



الجميع يجرون في فوضى بدون نظام ويخرجون من المسرح  
موسيقى تناسب الموقف

يسدل الستار



## المنظر الثالث

المكان : الغابة وبها أشجار خضراء حول مكان مرتفع ( نصف برميل  
مثلا يدهن بشكل قوالب طوب فتظهر كأنها بنس)

استعراض غنائي للأرانب

مجموعة من الأرانب ترعى العشب وهم يغنون

( أغنية تعبر عن السعادة والعيش الرغد حول عين القمر)

الاستعراض الأول:

احنا الأرانب احنا الأرانب .... نحب بعضنا ونحمي أمننا

نعيش سوا في أمان وسلام .... ونقسم أكلنا ونشبع كلنا

الكبير يخاف على صغيرنا ... والصغير يحترم كبيرنا

ناكل ونشرب نفرح ونمرح ... لانحب الحزن ولانحب الظلم

احنا الأرانب احنا الأرانب ... نعيش سوا في أمان وسلام

الأرانب يتحركون في أرجاء المسرح الصغار يلعبون ويجرون خلف  
بعضهم ويضحكون

صوت الغيلة يأتي من بعيد ويحدث ضوضاء شديدة

الجميع يصيحون في خوف وهم يتفرقون في كل الاتجاهات على  
خشبة المسرح وبعضهم يخرج من المسرح

أحد الأرناب (يصيح) : بسرعة استخبوا بسرعة

أرناب ١ : إيه ده؟

أرناب ٢ : مش عارف اهرب بسرعة

أرناب ١ : يمكن حيوانات مفترسة

أرناب ٢ : المهم نهرب دلوقت قبل ما يجوا

أرناب يظل يقف في منتصف المسرح وتاتي ( ياسمينة ) وتسحبه من  
يده وتخرج به من المسرح و تقول

ياسمينة : يالا بسرعة قبل ما يدسوك

الأرناب الصغير: مين يا أمي؟

ياسمينة : مش عارفة يالا بسرعة

تسمع استغاثة وآهات من الأرناب تختلط مع صوت الفيلة المندفعة  
إلى المسرح و الأفيال يدخلون إلى المسرح يجرون في فوضى مع  
ارتفاع أصوات الأرناب

ياسمينة: آه

أرناب ٢ : حاسب

ياسمينة: آه بيتي اتهدم

أرنب ١ : منكم لله

أرنب ٢ : ولادي حرام عليكم

زعيم الأفيال (يقف وسطهم) : الهدوء الهدوء بطلوا فوضي

الأفيال يهجمون على عين الماء وبدلون بخراطيمهم إليه يشربون

بعضهم يأخذ في تناول العشب في نهم

فلفل : يا زعيم خليهم يشربوا ويشبعوا

الزعيم : ايوه بس النظام مطلوب

الفيل ٢ : يا عم خليهم يعيشوا ويفرحوا

الزعيم : انت شايف كدة

فلفل : طبعا يا ريس

الزعيم : لكن بالتاكيد حد ساكن هنا

فلفل : لا دول حبة أرنب صغيرين كدة لكن من النهاردة عين

الميه دي بتعتنا احنا

الجميع (يضحكون) : هاهاهاها

الفيل : يا عم خليهم يشوفولهم حته تانية يعيشوا فيها

الجميع (يضحكون) : هاهاهاها

ثم يتجمعون حول الزعيم ويهتفون

الفيلة : أيوه أيوه يعيش فنفل يعيش فنفل  
فنفل : الأرض لنا احنا... دي أرضنا دلوقت  
الزعيم : يمكن الأرانب مايعجبهمش الحال ده  
فنفل : وإيه يعني؟ إذا كان عاجبهم  
فيل ٢ : لو ما عجبهمش يشربوا من البحر... هاهاهاها  
الجميع (يضحكون): هاهاهاهاهاهاهاها

يسدل الستار

# المنظر الرابع

الغابة ومجموعة الأرناب تقف معا فى حزن بدون البئر والأرنبة  
ياسمينة تجلس وهي تضع الأرنب الصغير مربوط الرأس أمامها

موسيقى حزينة

ياسمينة (تبكي): لازم ننتقم منهم

أرنب ١: أيوة هدموا جحورنا

أرنب ٢: وقتلوا أصحابنا

الزعيم: واخذوا أرضنا

أرنب ١: أيوة احتلوا أرضنا اغتصبوها منا

أرنب ٢: وعكروا ميتنا

زعيم الأرناب: يا جماعة ممكن نتشاور ونتفق حنعمل إيه

أرنب ٢: أيوة اقعدوا نتشاور مع بعض

ياسمينة (تبكي): لازم نطردهم لازم

الزعيم: طبعا حنطردهم بس لازم نفكر بعقلنا هم أفيال واحنا أرناب  
والفرق بينا كيببيير وواضح

( يشير بيديه للدلالة على الحجم )

أرنب ٢ : صح يا زعيم

أرنب ١ : آه علشان كده لازم نفكر

الزعيم : وانت يا ياسمينة انت حكيمة الارانب

أرنب ٢ : وديما رايك صحيح

أرنب ١ : وكلامك معقول علشان عقلك كبير وذكية

الزعيم : قولي لنا رأيك... نعمل إيه؟

الارانب تتجمع حول ياسمينة

أرنب ٢ : أولي أولي بسرعة

أرنب ٢ : فكري في طريقة نطردهم من أرضنا

ياسمينة تفكر وهي تسير على المسرح قليلا ثم تقف وتتحدث إلى الجمهور

ياسمينة : احنا مانقدرش علي الفيلة لأنها طبعا حتغلبنا

( تشير بيديها لحجمها )

الجميع (يصيحون): صح

ياسمينة : علشان كده لازم نحتال عليهم بالعقل ونخدعهم

الزعيم : صح يا ياسمينة طب حنعمل إيه؟

أرنب ٢ : أيوة قولي حنعمل إيه؟

ياسمينة : حنحتال عليهم لحد ما نطفشهم من أرضنا

الجميع (يصيحون) : إزاي.. إزاي؟؟

أرنب ١ : نرميهم بالحجارة

أرنب ٢ : مش حيتأثروا بيها

الزعيم : صح دي أجسامهم كبيرة وجلدهم تخيييين

ياسمينة: لأ.. أنا حروح لزعيمهم واستخدم معاه الدهاء فالقينة لها  
جسم كبير لكن احنا بالعقل ممكن نغلبهم

الزعيم : آه ممكن صح... بس لازم نفكر كويس حنعمل إيه

ياسمينة(تتكلم مع الجمهور): عشان كده حنغلبهم بأذن الله بالعقل مش  
بالحرب والقتال إيه رأيكم مش صح كده

الجميع : طبعا صح

الزعيم : دائما أقول عليكي يا ياسمينة إن عقلك يوزن بلد

الجميع (يضحكون) : هاهاهاها

الزعيم : يلا علي بركة الله روعي ونفذي خطتك

ياسمينة: الليلة والقمر ساطع حنفذ خطتي

أرنب ١ : الله معاكي واحنا معاكي.. ربنا يوفقك

يسدل الستار

# المنظر الخامس

الوقت : ليل

المكان : الغابة وفي أحد أركان المسرح صخرة عالية

خلفية مظلمة تدل على الليل و قمر يبرر المسرح ( لمبة خلف شكل مدور مثل القمر) وضوء خافت

الفيلة ينامون على أرض المسرح وأصواتهم تعلو بالشخير

موسيقى تتم عن الخوف

تدخل ياسمينة بهدوء وتدور حول الفيلة وتعتلي الصخرة وتضع يديها حول فمها وتنادي

ياسمينة : يازعيم الفيلة ... أنت يا كبير الفيلة

الفيلة يقفون ويحدث حركة بين الجميع يتجهون إلى الصوت الآتي من الصخرة

زعيم الفيلة : مين مين بينده؟

ياسمينة : أنا أنا هنا .... أنا أنا ياسمينة

زعيم الفيلة : ياسمينة مين؟؟ احنا عندنا حد اسمه ياسمينة

الفيل ١ : لا لا مافيش

الفيل ٢ : لا احنا أسامينا كلها بانفاء مش بانياء

زعيم الفيلة : طب انت مين يا ياسمينه ؟

ياسمينه (بصوت كله خوف) : أنا أنا الأرنبه ياسمينه

زعيم الفيلة ( يتلفت حوله) : انت فين ؟

ياسمينه : أنا هنا فوق الصخرة

الجميع يلتفتون إلى الصخرة

زعيم الفيلة : وانت فوق الصخرة ليه ما تنزلي هنا

ياسمينه : لا أنا هنا أحسن

زعيم الفيلة : طب عاوزة إيه يا ياسمين وبتنادي عليه ليه؟

ياسمينه : شوف يا سيدي أنا جياالك رسول من القمر

زعيم الفيلة : قمر مين ؟

ياسمينه : يا سيدي القمر القمر صاحب العين

زعيم الفيلة : آه القمر صاحب العين

الزعيم : عين مين؟

ياسمينه : بيبيبيوه عين القمر .. أقصد عين المية

يسمع همهمة الأفيال يتساءلون

الأفيال : صاحب العين؟؟ القمر؟؟

زعيم الفيلة: وعاوز إيه سي القمر ده؟

ياسمينة ( في تردد): آه يقول لك..... يقول لك

زعيم الفيلة (في ضجر): يقول إيه قولي

ياسمينة : يقول.. يقول

زعيم الفيلة : أف قولي بأه وخلصيني

ياسمينة : طيب طيب ماتت عصبش كده

زعيم الفيلة : طيب يا ستي مش حتعصب بس اخلصي وقولي عاوز  
إيه سي القمر ده؟

ياسمينة : يقول لك الغرور أخرته وحشة

زعيم الفيلة : الغرور؟؟ مين المغرور أنا؟

ياسمينة : يا سيدي هو اللي يقول مش أنا

زعيم الفيلة : طيب وإيه كمان؟ قولي يقول إيه تاني سي قمر

ياسمينة : وبيقول كمان القوة والاعتداء علي الضعفاء نهايته سودة

( زعيم الفيلة يمد زلومته ناحيتها كانه سيضربها ويقول في عصبية )

زعيم الفيلة : نهاية مين يا بت

ياسمينة : ياعم استنى مش أنا اللي بقول

زعيم الفيلة : مش انت مش انت أمال مين؟

ياسمينة : قولت القمر صاحب العين

زعيم الفيلة : طيب وبعدين؟

ياسمينة : وبعدين يا سيدي ولا ستك إلا أنا..... بيقول كمان إنك قتلت الأرانب الصغيرة والكبيرة كمان

زعيم الفيلة (باستكار) : أنا... أنا!!!

ياسمينة : أيوة انت واللي معاك وغرتكم قوتكم ..... وجيتوا لعين المية بدون استئذان وعكرتم المية

زعيم الفيلة (برد في غرور) : وإيه يعني؟

ياسمينة : هو غضبان قوي قوي منكم

زعيم الفيلة (بسخرية) : كمان طب وبعدين عوزني اعمله إيه ؟

ياسمينة : ماتتكلمش عنه كده... إنت مش خايف؟

فافل : انت حتصدقها يا زعيم؟

زعيم الفيلة : يا ستي مش خايف يعني حيعمل إيه؟

ياسمينة (تخوفه) : يامسكين انت مش عارف حيصل لك إيه يا مسكين

زعيم الفيلة (في غرور) : يعني حيحصل إيه يعني ؟؟؟؟

فافل : دي فشارة يازعيم سيبك منها

الجميع (بضحكون) : هاهah

فيل ١ : يا ريس دي بتخوفك

فيل ٢ : قال قمر قال

ياسمينة : انتم مش عارفين اللي حيصل ايه يا مسكين هو ينذر بس

زعيم القبيلة ( فى تحدي ) : قولي قولي كده بتقولي ايه؟

ياسمينة (فى تهويل) : حيعميك ومش حتشوف حاجة أبدا

زعيم القبيلة : احنا حنعيش هنا وناكل ونشرب من العين وعاوز

اشوف حيعميني إزاي؟

ياسمينة : انت مش مصدق؟

فافل : طبعا مش حنصدق

ياسمينة : طب تعالوا معايا وانتم تشوفوا بنفسكم حيحصل ايه

فافل : طبعا حاتيحي ونشوف حيعمل ايه يللا

زعيم القبيلة : طبعا حانروح وحوريه قوتي واعرفه شغله

القبيلة جميعا (يصيحون): طبعا يللا يا ريس نروح ونوريه شغله

الجميع يتحركون ويخرجون من المسرح وخلفهم الأرنبة ياسمينة

وهي تلم على وجهها

ياسمينة : ربنا يستر ويصدقوا النعبة

موسيقى مناسبة

يسدل الستار

## المنظر السادس

الستار يفتح على المسرح وليل وقمر) لمبة خلف شكل مدور مثل  
القمر) عين الماء وحولها الأشجار الخضراء

الفيلة يدخلون مندفعين إلى المسرح وخلفهم الأرنبة وباسمين  
خلفهم

الزعيم : آدي احنا عند العين وريني حيعمل فينا إيه سي قمر بتاعك

ياسمينة تشير إلى السماء

ياسمينة : أهه فوق لكنه سينزل إلى العين الآن

الزعيم (ينظر داخل البئر) : هو ده اللي جوه العين؟

ياسمينة : صح هو

الزعيم يدخل زلومته إلى البئر ثم يسحبها بسرعة

الزعيم : الله هو بيترعش كده ليه؟

ياسمينة : علشان هو زعلان منكم... بص.. بص

تتجه ياسمينة إلى العين وخلفها الزعيم وينظران إلى البئر

الزعيم : طب بس هو زعلان ليه؟

ياسمينة : بص له شوية وهو حيكلمك

الزعيم ينظر في البئر يخرج من البئر ضوء مصلت على عينيه فيصرخ و  
يتراجع

الزعيم : آه عيني آه

يتقدم فلفل من البئر وينظر فيخرج ضوء مصلت على عينيه فيصرخ  
ويتراجع

فلفل : آه عيني آه

ياسمينة : أنا مش قلت لكم حيعميكم شفت بقه

الفيل : عيني تعباني

فلفل : عيني وجعاني خالص

ياسمينة : حظ زلومتك في المية واغسل وشك بسرعة

الزعيم وفلفل يضعان الزلومة في البئر ثم يترجعان بسرعة في  
خوف

زعيم الفيلة (منزعجا): ده لسه بيترعش ؟

ياسمينة (بخت) : آه شوف هو غضبان قوي دلوقت

زعيم الفيلة (في خوف): هو زعل علشان حظيت زلومتى في المية

ياسمينة : أيوة اعتذر له بسرعة قبل ما يغضب أكثر واطلب العفو

زعيم الفيلة يرفع عينيه إلى القمر ويقول في توسل

الزعيم : يا قمر أنا اعتذر لك علي كل حاجة عملناها هنا بس  
ماتغضبش علينا أرجوك

في هذه اللحظة يوضع شكل سحابة أمام القمر فيحجب النور عن  
المسرح ويعم الظلام

ياسمينة (تصيح) : شفتم القمر غاضب جدا عليكم

زعيم القبيلة ( بصوت مرتعش ) : وبعدين أنا خايف ليعميني

ياسمينة : هو مش عاوزكم في أرضه

فيل ١ ( بصوت مرتعش ) : أنا خايف خالص

فيل ٢ ( بصوت مرتعش ) : وأنا كمان

فلفل ( مرتعشا ) : وبعدين يا زعيم؟

زعيم القبيلة ( مرتعشا ) : مش عارف

ياسمينة : لازم تهربوا بسرعة قبل القمر ما يعميكم كلكم

زعيم القبيلة: فعلا لازم نهرب يلا بسرعة يا جماعة نشوف لنا مكان

تاني

صوت هرج ومرج وضجيج وصوت أقدام القبيلة تجري علي المسرح  
حتى يختفي الصوت

يرفع شكل السحابة من فوق اللمبة ويعود النور إلى المسرح والأرنبه  
ياسمينة تقف علي المسرح ترقص في فرح وهي تقول

ياسمينة : وصدقوا.. وصدقوا

تدخل باقى الأرناب فى فرح ويلتفون حول ياسمين

زعيم الأرناب : برافو عليك يا ياسمينة

ياسمينة : شكرا يا ريس

أرناب ١ : لكن إزاي اقتعتيهم وخليتيهم يهربوا؟

ياسمينة : بالعقل

زعيم الأرناب : طب قولى لنا إزاي؟

ياسمينة : انا استغلّيت وجود نور القمر وصورته اللي فى البير  
وخليتهم يبصوا جواه فانعكس نور القمر على عيونهم  
فماقدروش يشوفوا

أرناب ٢ : فصدقوا إنهم اتعموا

ياسمينة : أيوه النور لمة يجي على العين الواحد مايشفش

زعيم الأرناب : الحمد لله قدرنا نتغلب عليهم بالعقل والدهاء مش  
بالحرب والقتال كان ممكن تدور بينا حرب وقتل  
ونفقد كثير من الأرناب والفيلة لكن كان لابد لنا أن  
نفكر بالعقل ونفهم الوضع ونقارن بين حجمهم  
وأحجامنا وشراستهم وضعفنا علشان كده كان لازم  
نفكر ونحكم عقلنا ونشوف أفضل طريقة نتخلص  
بيها من المحتل ونحافظ على أولادنا وأرضنا ولا إيه؟

( الأرنبة تتحدث مع الجمهور فى الصالة )

ياسمينة : إيه رأيكم ؟؟؟ كنا نحارب .... ولا نفكر بالعقل ؟

الجمهور (يرد) : نفكر بالعقل

ياسمينة : صح ... نفكر بالعقل أفضل ... ودلوقت بعد ما حررنا  
بلدنا ورجع لينا السلام والأمان ... يلا بينا نفرح ونغني

يلا يا أرانب كلكم افرحوا وغنوا وقولوا بالعقل والدهاء مش بالحرب  
والقتال نحرر أرضنا

الأرانب يرقصون معبرين عن فرحتهم بجلاء المحتل عن أرضهم

يسدل ستار الختام